

四庫全書

史部

欽定四庫全書

史部

歷代名臣奏議卷二百四十五
六

詳校官編修_臣周瓊

編修_臣裴謙覆助

總校官編修_臣王燕緒

校對官編修_臣沈清藻

謄錄監生_臣毛杞

欽定四庫全書

歷代名臣奏議卷二百四十五

明

楊士奇等 撰

荒政

宋哲宗元祐元年門下侍郎司馬光論賑濟劄子曰臣竊惟鄉村人戶播植百穀種藝桑麻乃天下衣食之原比於餘民尤宜存恤凡人情戀土各願安居苟非無以自存豈願流移它境國家若於未流移之前早行賑濟

使糧食相接不至失業則比屋安堵官中所費少而民間實受賜若於既流移之後方散米煮粥以有限之儲蓄待無窮之流民徒更聚而餓死官中所費多而民實無所濟伏覩近降朝旨令戶部指揮府界諸路提點刑獄司體量州縣人戶如委是闕食據見在義倉及常平米穀速行賑濟仍丁寧指揮州縣多方存恤無致流移失所此誠得安民之要道然所以能使民不流移者全在本縣令佐得人欲使更令提點刑獄司指揮逐縣令

佐專切體量鄉村人戶有闕食者一面申知上司及本
州更不候回報即將本縣義倉及常平倉米穀直行賑
貸仍據鄉村五等人戶逐戶計口出給歷頭大人日給
二升小兒日給一升令各從民便或五日或十日或半
月一次齎歷頭詣縣請領縣司亦置簿照會若本縣米
穀數少則先從下戶出給歷頭有餘則并及上戶其不
願請領者亦聽候將來夏秋成熟糧食相接日即據簿
歷上所貸過糧令隨稅送納一斗只納一斗更無利息

其令佐若別有良法簡易便民勝於此法者亦聽從便
要在民不乏食不至流移而已仍令提點刑獄司常切
體量逐縣令佐有能用心存恤闕食人戶雖係災傷並
不流移者保明聞奏優於酬獎其全不用心賑貸致戶
口多流移者取勘聞奏乞行停替庶使吏有所勸沮百
姓實霑聖澤

光又乞趁時收糴常平斛斗劄子曰臣勘會舊常平倉
法以豐歲穀賤傷農故官中比在市添價收糴使蓄積

之家無由邀勒貧民須令貴糶物價常平公私兩利此
乃三代之良法也邠者有因州縣闕常平糶本錢雖遇
豐歲無錢收糶又有官吏怠慢厭糶糶之煩雖遇豐歲
不肯收糶又有官吏不能察知在市斛斗實價只信憑
行人與蓄積之家通同作弊當收成之初農夫要錢急
糶之時故意小估價例令官中收糶不得盡入蓄積之
家直至過時蓄積之家倉廩盈滿方始頓添價例中糶
入官是以農夫糶穀止得賤價官中糶穀常用貴價厚

利皆歸蓄積之家又有官吏雖欲趁時收糴而縣申州
州申提點刑獄提點刑獄申司農寺取候指揮比至回
報動涉累月已是失時穀價倍貴是致州縣常平倉斛
斗有經隔多年在市價例終不及元糴之價出糴不行
堆積腐爛者此乃法因人壞非法之不善也熙寧之初
執政以舊常平法為不善更將糴本作青苗錢散與人
戶令出息二分置提舉官以督之豐歲則農夫糴穀十
不得四五之價凶年則屠牛賣肉伐桑賣薪以輸錢於

官錢貨愈重穀直愈輕朝廷深知其弊故罷提舉官令將累年蓄積錢穀財物盡椿作常平倉錢物委提點刑獄交割主管依舊常平倉法施行今歲諸路除有水災州軍外其餘豐熟處多今欲特降指揮下諸路提點刑獄司乘有此糴本之時委豐熟州縣官各體察在市斛斗實價多添錢數廣行收糴如闕少倉廩之處以常平倉錢添蓋仍令少糴麥豆多糴穀米其南方及川界卑溼之地有斛斗難以久貯者即委提點刑獄相度逐州

縣合銷數目拋降收糶纔候將來在市物貨價比元糶價稍增即行出糶不得令積壓損壞仍令州縣各勒行人將十年以來在市斛斗價例比較立定貴賤酌中價例然後將逐色價分為三等自幾錢至幾錢為中等價幾錢以上為上等價幾錢以下為下等價令逐處臨時斟酌加減務在合宜既約定三等價仰自今後州縣每遇豐歲斛斗價賤至下等之時即比市價相度添錢開場收糶凶年斛斗價貴至上等之時即比市價相度減

錢開場出糶若在市見價只在中等之內即不糶糶更
不申取本州及上司指揮免有稽滯失時之患仍委提
點刑獄常提舉覺若州縣斛斗價及下等而不收糶價
及上等而不出糶及收貯不如法變轉不以時致有損
壞並監官不逐日入場致壅積糶糶人戶並取勘施行
若州縣長吏及監官用心及時糶糶至得替時酌中價
錢與斛斗通行比折與初到任時增剩及十分中一分
以上許批書上歷子候到吏部日與升半年名次及二

分以上許指射家便差遣一次所貴官吏各各用心州縣皆有儲蓄雖遇游饑民無菜色又得官中所積之錢稍稍散在民間可使物貨流通其河北州縣有糴便司斛斗見多沿邊州縣轉運司見糴軍糧處更不糴常平倉斛斗若今來指揮內有未盡未便事件委提點刑獄司逐旋擘劃申奏施行

侍御史王巖叟乞常平不分立三等疏曰臣伏覩昨降朝旨文雖詳而未通四方來者更言其未便臣按常平

舊法但遇年豐物賤即與市價上添錢收糶如年儉物
貴即度在市實直價例特減錢出糶此所以為常平今
既限以價賤至下等方許收糶價貴至上等始得出糶
乃是必待豐歉十分而後行法稍不及等即官司拘文
束手坐視而不敢糶糶臣恐久之天下救災之備寡而
傷農之患多失常平本意遠矣臣乞依舊法不分立三
等仍更不申取本州及上司指揮外餘約新降朝旨別
行修定頒降

巖叟又請依舊法賑濟免河北貸糧出息疏曰伏以救災恤患惟恐有所不至以傷其仁先王之用心也隨施以有求乘危以論利益不忍焉臣按祖宗賑濟舊法災傷無分數之限人戶無等第之差皆得借貸但令隨稅納原數而已未嘗有息也故四方之人需惠者溥銜恩者深郡縣倉庾以陳易新者多其後刻薄之吏陰改舊法必待灾傷放稅七分以上方許貸借而第四等以下方免出息殊非朝廷本意緣災傷放稅多是監司以聚

斂為急威脅州縣州縣又承望風旨不復體心朝廷以災傷的實分數除放若放及七分者災傷已是十分況少肯放七分又六分之與七分相去幾何毫釐之間何以辨別幸而得為七分別有借貸不幸而為六分則無借貸但繫檢災官吏一言之高下而被災百姓幸不幸相遠如此不可不察也三等而上均為赤子均遇天災豈容因災偏令出息計其所得則甚少論其所損則實多乖陛下平一之心虧朝廷光大之施臣乞復如舊法

不限災傷之分數並容借貸不拘民戶之等第均令免
息庶幾聖澤無間感人心於至和天下幸甚如允臣所
奏其河北京西淮南等路昨來水災州縣乞先次指揮
施行

二年十二月著作郎范祖禹乞不限人數收養貧民劄子
曰臣伏見陛下以今冬大寒異於常年聖心憂軫救恤
小民無所不至近又出禁中錢十萬貫以賜貧民此誠
博施濟衆堯舜之仁也禮記曰財聚則人散財散則人

聚臣知此財一散而人心皆聚於朝廷矣古之聖人未有不矜恤孤貧者堯命舜舜命禹皆以四海困窮為說書稱不虐無告不廢困窮惟帝堯能之蓋置而不恤則是虐之矣棄而不養則是廢之矣伊尹稱湯曰先王子惠困窮周公曰文王懷保小民惠鮮鰥寡子學曰文王發政施仁必先鰥寡孤獨夫聖人養天下之民使貧者不至失所則不貧者自安是故古者為政必先恤困窮之民國朝祖宗以來惠恤孤貧仁政非一每遇大雨雪

則放公私房錢以至糶米賣炭散錢死者則賜錢瘞埋
惠及存沒近日朝廷無不舉行而又發內帑之錢降非
常之恩惠澤之厚無以加矣陛下勤恤小民如此而臣
忝在左右竊思有可以少補聖政之萬一者忍默而不
言哉古者鰥寡孤獨廢疾皆有養既養之則不至於凍
餒而死朝廷自嘉祐己前諸路有廣惠倉以救恤孤貧
京師有東西福田院以收養老幼廢疾至嘉祐八年十
二月又增置城南北福田共為四院此乃古之遺法也

然每院止以三百人為額臣竊以為京師之衆孤窮者不止千二百人又朝廷每遇大冬盛寒則臨時降旨救恤雖仁恩溥博然民已凍餒死損者衆夫救饑於未饑之時先為之法則人不至於饑死救寒於未寒之時預為之備則人不至於凍死今每歲收養與臨時救濟二者等為費用不若多養之為善也臣愚以為宜於四福田院增蓋官屋以處貧民不限人數並依舊法收養委左右廂提舉使臣每至冬月多設方略救濟或給米豆

設糜粥不必專散見錢其使臣存活到人數書為課績
量與酬獎死損多者亦立殿罰如四廂使臣提舉難遍
即委吏部臨時更選差使臣四員相兼提舉量與添給
仍理為重難短使存活死損殿最亦依四廂使臣法其
天下廣惠倉竊慮州縣不以為急乞更申明成法每歲
以時舉行委逐路監司丁寧行下所屬州縣及因巡歷
案視或於逐州別差官點檢使知朝廷掛意令官更用
心振恤須要實惠及貧民不得輕易以為末事畿內諸

縣亦乞令擘畫官屋依京師收養無令遠者聚於都下
重立條禁以絕主掌支散之人減刻之弊如此則物不
虛費而所活益多矣國家富有四海每歲用係省錢一
二萬緡於租賦之入無異海水之一勺而饑窮之人日
得十錢之資升合之米則不死矣此乃為國者所當用
王政之所先也況朝廷幸不惜費唯更增修舊法推廣
祖宗仁政以副陛下慘怛愛民之意夫何難哉臣竊惟
陛下近日所行萬萬於此而臣之所陳事乃至微然古

之聖人莫不以此為先務所以拯生民之性命其法不可不備也如臣言稍有可采伏乞詳酌施行

祖禹又論常平劄子曰臣竊以當今天下之患在於公私俱無蓄積無以待水旱凶歉一時不雨則民饑饉流亡昨春夏旱京西陝西艱食尤甚唐鄧人民相食遺棄男女流離道路其存者食犬彘之食饑民羣行劫米坐法配流者係繫相屬幸而得麥民復有生望故大盜不作耳然轉於溝壑與配隸遠方者已不可勝數仁聖在

上豈不哀憫而為之計慮哉夫以數月不雨適當青黃不接之際民已如此若不幸復有方二千里之水旱將何以救之自中夏以來雨水不至過多秋成可望諸郡雖有被水災之處然約計之收熟之處必多年穀稍登則公私逋負督迫民間速欲得錢無由貯積必至甚賤此農所以豐凶皆困也自非朝廷廣謀收糴以時發斂則無以平糴濟民今諸路提刑司積常平錢猶多竊恐自罷散青苗錢以來常平之法尚未修復如舊臣愚

欲乞速降指揮諸路提刑司乘今秋豐稔穀賤之時盡以所有之錢增價收糴使不至於甚賤傷農來春穀貴則減價出糴使不至於甚貴傷民若止以常平錢收糴恐亦未廣陛下誠能出內庫金帛數十萬以為糴本專以備水旱凶荒發斂以時則官本常存而民被惠澤無窮濟民之命無大於此祖宗置內藏庫本以備軍旅非常之用仁宗嘗出錢一百萬緡以助常平糴本此仁恩所以深結於民心也夫財出於民復以濟民但使民存

不至流亡則今年散之明年復有何患乎無財也前年冬大寒陛下出錢十萬緡散之窮民民苦於寒陛下不忍坐視其死捐以與之誠知民為國本不可不愛惜也況糴本常不動而可以利民止是以內庫之錢借之外路又有先朝故事何憚而不為乎如以臣言為然乞早賜施行

祖禹又論常平劄子曰臣竊以為國之本在於務農務農之本在於貴穀舜咨十二牧曰食哉惟時洪範八政

以食貨為首孔子曰所重民食畜積者邦國之大本生
民之大命也臣伏見累年以來天災流行年穀不熟昨
春夏之交天久不雨陛下憂勞旻食於上大臣惶恐請
罪於下豈非以倉廩空虛民無所食盜賊並起將有不
可知之變哉一朝得雨報賽神祇則君臣釋然相慶不
復以民食為念矣夫歲之豐凶天之常也豐年常少凶
年常多水旱之災堯湯所以不能免然而國不因民不
亡者有畜積以為之備也昨春夏未雨之時民已無復

生理幸而得麥出於望外豈可常思僥倖天災之不成也臣訪聞諸路今秋可望大熟民間不唯速欲得錢必至甚賤又小民不為遠慮一熟則輕賤五穀粒米狼戾古之聖王知其如此是故操斂散之術以權之管子曰民有餘則輕之故人君斂之以輕民不足則重之故人君散之以重輕重之權在上則其利不入於兼并之家而農民常得其平此所以家給人足也至於衰世豐不知斂凶不知散故其政荒其民流孟子曰狗彘食人食

而不知檢塗有餓莩而不知發如此者其國幾何而不
亡也今天下背本趨末民惟視上之所好若朝廷以農
為急乃可使民務本黃金珠玉饑不可食寒不可衣然
而人貴之者好之者衆也誠使貴五穀而賤金玉則民
豈有不以穀為重者哉布帛不可一日而闕亦皆人
力所為至於五穀天不生地不長則非人力所能致也
昔梁武帝享國幾五十年江南久安風俗奢侈不務畜
積侯景之亂連年旱蝗富民皆懷金玉衣錦綺相枕籍

而死唐末高駢亂淮南揚州米斗至直錢五十千皆史冊所載古有此事安知來世之必無也今夫夏則畜炭冬則藏水凡民皆能知之至於豐年則不知為凶歲之備蓋以五穀為常有而輕之耳古人早則備水水則備旱豐登則備凶歉知天時之有必至也惟陛下留意於務農貴穀修常平之政以厚天下

六年七月祖禹為給事中又封還臣寮論浙西賑濟事狀曰準中書省錄黃臣寮上言竊聞浙西州軍近以灾

傷朝廷選差轉運副使岑象求運判楊懷寶仍賜米百萬斛錢二十餘萬緡俾救其惠州縣自亦依條發倉廩作粥飯救濟行將少蘇矣細民習為驕虛以少為多其弊已久欲乞明詔本路監司并州縣詳具災傷分數賑貸行遣次第各行申奏徐考其虛實而懲責其尤甚者候勅旨又臣察上言訪聞兩浙水災惟蘇湖秀三州為甚外常杭二郡絕為輕小其三州之地亦有高下不等今傳言者或謂水災至大無可種之田或謂高田無水

下田水退有可種之處以謂本因風駕海水江湖壅遏加之雨多遂有漲涌之患風退水落此患自弭可以種作人言異同如此誠不可以不察乞下本路鈐轄轉運提刑及蘇湖等五州令各開具逐州水灾所及凡幾縣幾村有無漂蕩廬舍溺死人口及高田無水與水退可耕之地各約若干並令詣實申奏不得相關稍涉謬妄即乞重行降黜兼朝廷近日別遣使者支撥斛斛一百萬見錢度牒約計二十萬貫不為不多若見今未種今

秋無獲則向去乏食賑濟之期甚為長遠所差去官當相度事體措置凡此皆繫官吏能否而一有失當其害非輕乞令賑濟官司凡措置稍大事件並申取朝廷指揮其急切不可待報者雖許一面施行亦須便具畫一奏知所貴朝廷察其中否緩急未便可以救止候勅旨七月二十二日三省同奉聖旨並依奏者右臣謹按唐代宗大歷中霖雨損稼渭南縣令獨稱縣境不損遣御史按實損三千餘頃帝三思久之曰縣令字人之官不

損猶應言損何不仁如是乎貶渭南令為南浦尉德宗
正元中江淮大水宰相陸贄請遣使賑恤帝曰聞所損
殊少即議優恤恐生奸欺贄上奏曰流俗之弊多徇諂
諛揣所悅意即侈其言度所惡聞則小其事制備失所
常病於斯又曰所費者財用所收者人心苟不失人心
何憂乏用乃遣使宣撫水災憲宗元和中南方旱饑遣
使賑恤將行帝戒之曰朕宮中用帛一匹皆籍其數唯
調救百姓則不計費卿輩當體此意七年又謂宰相曰

卿輩屢言淮浙去歲水旱近有御史自彼還言不至為
災事竟如何李絳對曰臣按淮南浙東奏狀皆云水旱
人多流亡求設法招撫其意似恐朝廷罪之者豈肯無
災而妄言有災耶此蓋御史欲為奸諛以悅上意耳願
得其主名案致於法帝曰卿言是也國以人為本聞其
有災當亟救之豈可尚復疑之耶朕適者不思而言耳
命速蠲其租賦古之人君聞有災害唯責人不言其救
災唯恐人惜費又恐不及於事陸贄李絳賢相也亦專

信守臣奏報惡言者之小其事以緩君心之憂也今國
家建都於汴實就漕挽東南之利京師億萬之口所食
贍軍養民皆出於二浙此乃國之根本豈可不思其所
從來今陛下二方之赤子嗷嗷然有倒垂之急如嬰兒
之絕乳其死可立而待也方呼天赴訴開口待哺以延
朝夕之命為之父母者忍惜力而不救乎臣竊詳臣寮
所言朝廷已賜米百萬錢二十餘萬州縣亦自依條發
倉廩作粥飯救濟人行將少蘇矣臣竊以作粥救饑最

出下策夫民已至相聚食粥則疾疫將起饑困已甚死者必衆此乃災傷之極正當憂慮豈得便為少蘇又言細民習為驕虛以少為多其弊已久臣竊謂常年小有旱澇披訴災傷僥倖之民或容有此今浙西災害甚大民已流散乞食迫於死亡方且疑其習為驕虛而不加信何其忍哉又言乞詔監司州縣詳具災傷分數賑貸行遣次第各行申奏而懲責其尤甚者臣竊謂朝廷以侍從之臣為一路鈐轄又選差監司以往行未及境未

及設施朝廷既不憑信鈐轄司之言又戒約監司州縣
如此臣恐官吏束手不能有所施為上下觀望各求苟
免夫奏災傷分數過實賑濟用物稍廣此乃過之小者
正當濶畧不問以救人命若因此懲責一人則自今官
司必以為戒將坐視百姓之死而不救矣又臣寮言人
言異同不可不察乞下鈐轄提轉及蘇湖等五州各令
開具逐州水災所及凡幾縣幾村有無漂蕩廬舍溺死
人口及高田無水與水退可耕之地各約若干並令詣

實申奏不得相關稍涉謬妄乞重行降黜臣伏見近日浙西申奏自今年正月大雨至六月太湖泛溢蘇湖秀等州城市並遭水浸田不布種廬舍漂蕩民弃田賣牛散走乞食臣謂朝廷聞此當令官司如救焚拯溺猶恐不及今若降此指揮逐縣逐村須遣人抄劄廬舍人口田土數目饑荒之際此等行遣必為煩擾一事不實即憂及罰闔境皆死未必獲罪如此則賑濟却為閒慢百姓愈無救矣又言近日別遣使者支撥斛斗百萬見錢

度牒約二十萬不為不多若見今未種今秋無穫則向
去賑濟之期甚遠所差去官當相度事體措置一有失
當其害非輕今所差去官與時暫遣使不同若向去賑
濟期日長遠此乃本司職事在彼自當任責當且委以
措置不須約束免有疑惑觀望臣竊以今水潦方降秋
田殊未有望審如臣寮所言今秋無穫本路必更奏請
朝廷亦當接續應副則前日所賜未足為多況斛斗止
令出糶官不損直常平倉本無給散之法唯廣惠倉許

賑濟不足方許通支常平放稅及五分處仍不得過所
限之數兩倍浙西鈐轄司近方奏乞不限石斗尚未降
朝旨又奏夏田元未放稅以此觀之官司守法止有賑
救不及之事必無過當之理臣寮又言乞令賑濟官司
措置稍大事件並申取朝廷指揮其急不可待報者雖
許一面施行亦須便具畫一奏知所貴朝廷察其中否
緩急未便可以救止臣伏見英宗時臣叔祖鎮出知陳
州辭日英宗宣諭陳州累年災傷卿到彼悉心賑撫臣

鎮至州方直春種即發常平倉貸民種糧提刑司奏劾
官吏詔釋不問陳州至京不數日可以往返然猶不先
奏而行恐不及於事也神宗時西京大水遣郎官一人
御藥院內侍一人賑恤多方救濟北京亦然朝廷未嘗
先為條約以防之也今兩浙在二千里外事稍大者若
須申奏比及得報即已後時雖急切許一面施行若官
司畏避事無大小一皆奏請不敢專行則此法豈不為
害臣伏觀浙西鈐轄轉運司前後申奏累年災傷今歲

大水以至結罪保明奏乞斛斗度牒又云父老言四十年無此水災近奏蘇州饑民死者日有五七百人饑疫更甚於熙寧又湖州奏貧人入城死者相繼遺棄男女官為收養據此則災傷輕重亦可知矣今詳臣寮所言大意唯以朝廷所賜錢斛不少恐災傷不至如所奏故欲考察虛實懲責謬妄然臣之愚慮竊謂朝廷已賜錢斛百二十萬德深澤厚又選監司以往免更臨遣專使令監司方出國門錢斛纔至本路即降此指揮約束百

姓必謂朝廷重惜錢斛輕棄人命百二十萬已厭其多
將來乏食日遠復何所望所吝者財物所失者人心況
本路有鈐轄司轉運提刑司發運司互相監臨而轉運
司主財不欲多費故祖宗以來賑濟委提刑司蓋恐轉
運司惜物也監司州縣有凶年饑饉皆不得已而上聞
亦豈肯於無災之地振不饑之民耗散倉廩坐失租稅
以取不辦之責哉今唯當戒飭官司多為方畧存活人
命寬其約束責以成效庶幾餘民早獲安堵唯是給散

無法枉耗官廩賑救不及貧弱出糶反利兼并措置乖方所宜約束然此乃監司使者之事朝廷亦難遙為處畫也若監司得人此弊自少誠使有之則人言相傳亦豈可掩臺諫足以風聞彈奏朝廷足以考察案劾未為晚也今先降此指揮徒能牽制撓亂其所為耳伏望聖慈以遠方生靈性命為念無以官司賑濟過甚為憂其臣寮所言伏乞更不施行所有錄黃謹具封還

祖禹為翰林學士又上恤民劄子曰臣伏見陛下即位

以來惻怛愛民出於誠心一有災傷則遣使振救倉廩
府庫無所愛惜十年之間凡兩出內庫錢十萬緡以賜
京師寒凍之民祖宗之時唯是蠲放欠負未聞賜錢如
此之多陛下德澤深厚乃古聖帝明王之用心也然而
天災流行民食猶難臣訪聞河北諸郡聚饑民所在以
數萬若今歲夏秋更一不熟不知國力何以繼之臣願
陛下更與執政大臣圖救民之術朝廷政事宜務安靜
無所作為專聽於民左右從之未有民安而國不安民

和而天不應者也陛下養民如子視民如傷今民方饑困尤當以安之為急唯陛下深留聖思以固邦本天下幸甚

元祐二年知潞州梁燾上奏曰臣伏見去冬苦寒今秋大旱被災之民如卧焦灼日望睿澤湔濯瘡痍陛下恐懼天戒惻怛民隱誠意內修政事外飭未損靜治願寬聖憂但當采用公言講求仁術坐致明恩實惠徧及四海則降監昭昭還受嘉福矣臣以謂人已久困歲復洊

饑今來凍餒已足深憂向去流離尤為大患正在朝廷
衣食拊循固結其意以父母妻子為愛以墳墓閭井為
戀相扶而不貳相死而不去不貳則盜賊不起不去則
田野不曠固本寧邦其要在此臣聞天下倚闥稅賦編
敕以限年催理雖催理之令行於豐年而多值災傷間
獲小稔官曹執法督迫期會縱得十分豐熟亦隨百色
分張故民間愁怨紛紜常以欠負為苦官中所入既有
限數之內往往不足至有嚴刑峻令僅獲無遺官帑小

補而民室大空矣三年一遇大禮竟用赦恩蠲免在公
徒有理欠之名在私乃有刻剝之弊是存空名於公家
而行實敝於私門也為害如此何益治體臣欲乞聖慈
特降指揮勘會災傷路分自元祐二年以前有見在倚
閣稅賦一切除放以救百姓今日目前之急如此則明
恩實惠下及幽遠感激歡欣咸歸聖惠若郡縣得人欽
體詔旨更求勞徠安集之方免凍餒流離之苦前接麥
熟終保安全和氣既充陰陽自順四時協序百穀用成

數年之間稅賦之入可以加倍倚閣之數矣陛下必欲救全百姓此事最為切當伏望斷自宸衷無容回奪使中外明知非常之恩出自兩宮則天下幸甚

四年二月左司諫劉安世與右諫議大夫朱光庭同乞更張常平之弊疏曰臣等聞國無九年之蓄曰不足無六年之蓄曰急無三年之蓄曰國非其國蓋先王之制三年耕必有一年之食以三十年通之則可以有十年之備故堯湯之水旱至於累歲而無捐瘠之民者用此

道也三代而下井田廢缺利民之法無善於常平由漢
迄今莫能變易惟自近世有名無實凡所以養民之具
月計不足何暇議三年之蓄哉是以歲或不登民輒菜
色強者轉而為盜賊弱者不免於餓殍保民之術如此
亦以疏矣臣等竊謂自罷青苗錢後來天下州縣皆有
積鏹朝廷雖更立常平之制條目甚詳而上下因循未
嘗留意既無統屬以糾其乖繆又無賞罰以為之勸沮
加之轉運司苟紓目前之急多端借貸日朘月削殊無

償足之期非有懲革將不勝弊臣伏望聖慈特降睿旨
取今日以前應干常平敕令嚴責近限專委戶部刪為
一書付之有司悉俾遵守仍先行指揮將天下見在常
平錢乘今秋豐稔之時令五路糴粟一色其餘路分並
相度逐處可以久留斛斗廣行收糴仍以本司錢修蓋
合用倉廩將一路所有錢衮同應副一路之中不得偏
聚一州一州之境不得偏聚一縣各隨戶口之多寡以
置糴入之大數每遇凶歉依法出糴糴糶之法常以市

價增減如此則官本常存而物價不能翔躑或遇旱乾水溢之災則民有所濟不至流散朝廷之惠澤可繼而無乏絕之患相因日久漸至九年之蓄太平之策莫大於此惟陛下推至誠惻怛之意明詔執政協力施行所有官吏殿最亦乞參酌修定將來頒降之後或有違犯州縣委監司監司令戶部御史臺覺察奏劾庶使二聖卹民之仁心不為徒然之政傳之萬世天下幸甚

安世又奏乞振貸鳳翔府界饑民疏曰右臣伏聞京西

關陝去歲時穀不登農民艱食兩路郡邑已行賑貸而鳳翔永興實為接境旱災分數大槩畧同物價翔踴民多菜色臣聞秦鳳路諸郡各收五分惟是岐下實所不及然而轉運司牽於隣州之例放稅止於五分拘礙常法不該賑濟今方中春民已窮困若候夏麥必致餓殍此聞崔謀鎮白晝驚劫愚民急迫豈有常心與其委於溝壑不若亡命為盜以幸萬一之免竊恐因此饑饉寇賊充斥使關中之民不得安堵非細故也臣愚欲乞朝

廷專委秦鳳路提刑司疾速體量若鳳翔境內委實荒
歉則一面令本司依永興軍路災傷州縣特行賑貸更
不奏候朝旨如此則非惟千里之人得免轉死之患至
於寇盜亦當衰息伏望聖慈詳酌早賜指揮

安世又為歲旱乞講荒政疏曰臣伏見去年經冬時雪
愆候今春涉夏益苦亢旱二麥將稿秋種未布民已艱
食歲事可憂雖兩宮焦勞祠禱備至應祈之澤終未霑
足臣嘗觀國朝故事太祖建隆元年以揚泗民多饑死

郡中軍儲尚百餘萬斛即命發廩賑貸乾德二年嘗詔諸州長吏視民田旱甚者即蠲其租不必俟報太宗或遇旱歲必䟽食減食品三之二得雨乃復常膳真宗祥符八年以京東物價稍貴令有司出常平粟減價糶用濟貧民九年詔江淮發運司歲留上供米五十萬以備賑濟今來旱勢濶遠事宜前慮至於散利緩刑弛力蕃樂索鬼神除盜賊皆聖人救荒之政亦宜先事而講伏望聖慈上法三聖之意下考成周之典凡可以救災恤民者

次第施行

五年七月知杭州蘇軾乞預備來年救饑之術上奏曰
臣聞事豫則立不豫則廢此古今不刊之語也至於救
灾恤患尤當在早若灾傷之民救之於未饑則用物約
而所及廣不過寬減上供糴賣常平官無大失而人人
受賜今歲之事是也若救之於已饑則用物博而所及
微至於耗散省倉虧損課利官為一困而已饑之民終
於死亡熙寧之事是也熙寧之災傷本緣天旱米貴而

沈起張靚之流不先事奏聞但立賞閉糴富民皆爭藏穀小民無所得食流殍既作然後朝廷知之始敕運江西及截本路上供米一百二十三萬石濟之巡門俵米攔街散粥終不能救饑饉既而繼之以疫疾本路死者五十餘萬人城郭蕭條田野丘墟兩稅課利皆失其舊勘會熙寧八年本路放稅米一百三十萬石酒課虧減六十七萬餘貫畧計所失共計三百餘萬石其餘耗散不可悉數至今轉運司貧乏不能舉手此無它不先事

處置之過也去年浙西數郡先水後旱災傷不減熙寧
二聖仁智聰明於去年十一月中首發德音截撥本路
上供斛斛二十萬石賑濟又於十二月終寬減轉運司
元祐四年上供斛斛米三分之一為米五十餘萬斛盡
用其錢買銀絹上供了無一毫虧損縣官而命下之日
所在歡呼官既往糴米價自落又自正月開倉糴常平
米仍免數路稅場所收五穀力勝錢且賜度牒三百道
以助賑濟本路帖然遂無一人餓殍者此無它先事處

置之力也由此觀之事豫則立不豫則廢其禍福相絕
如此洪惟二聖天地父母之心見民疾苦匍匐救之本
不計較費多少而臣愚魯無識但知權利害之輕重計
得喪之大小以謂譬如民庶之家置莊田招佃客本望
租課非行仁義然猶至水旱之歲必須豁免欠負借貸
種糧者其心誠恐客散而田荒後日之失必倍於今故
也而況有天下子萬姓而不計其後乎臣自去歲以來
區區獻言屢瀆天聽者實恐陛下客散而田荒也去歲

杭州米價每斛至八九十自今年正月以來日漸減落至五六月間浙西數郡大雨不止太湖泛溢所在害稼六月初間米價復長七月初斛及百錢足陌見今新米已出而常平官米不敢住糶災傷之勢恐如去年何者去年之災如人初病今歲之災如病再發病狀雖同氣力衰耗恐難支持又緣春夏之交雨水調勻浙人喜於豐歲典賣舉債出息以事田作車水築圩高下殆遍下本已重指日待熟而淫雨風濤一舉害之民之窮困實

倍去歲近者將官劉季孫往蘇州閱教臣密令季孫沿
路體訪季孫還為臣言此數州不獨淫雨為害又多大
風駕起潮浪堤堰圩埤率皆破損湖州水入城中民家
皆尺餘此去歲所無有也而轉運判官張璠自常潤還
所言畧同云吳江平望八冊間有舉家田苗沒在深水
底父子聚哭以船棹撈撓云半米猶堪炒喫青穉且以
喂牛正使自今雨止已非豐歲而況止不止又未可知
則來歲之憂非復今年之比矣何以言之去年杭州管

常平米二十三萬石今來已糶過十五萬石雖餘八萬石而糶賣未已又緣去年災傷放稅及和糶不行省倉闕數所有上件常平米八萬石只了兌撥充軍糧更無見在惟糶米錢近八萬貫而錢非救饑之物若來歲米益貴錢益輕雖積錢如山終無所用熙寧中兩浙市易出錢百萬緡民無貧富皆得取用而米不可得故曳羅綺帶金玉橫尸道上者不可勝計今來浙東西大抵糶過常平米見在數絕少熙寧之憂凜凜在人眼中矣臣

材力短淺加之衰病而一路生齒憂責在臣受恩既深不敢別乞閒郡日夜思慮求來年救饑之術今來浙西數州米既不熟而轉運司又管上供年額斛斗一百五十餘萬石兩司爭糴米必大貴饑饉愈速和糴不行來年青黃不交之際常平有錢無米官吏拱手坐視人死而山海之間接連甌閩盜賊結集或生意外之患則雖誅殛臣等何補於敗以此須至具實聞奏伏望聖慈備錄臣奏行下戶部及本路轉運提刑兩路鈐轄司疾早

相度來年合與不合準常平斛斗出糶救饑如合準備
即具逐州合用數目臣已約度杭州合用二十萬石仍
具逐司擘劃合如何措置令米價不至大段翔躑收糶
得足如逐司以謂不須準備出糶救濟即令各具保明
來年委得不至饑殍流亡結罪聞奏緣今來已是立秋
去和糶月日無幾比及相度往復取旨深慮不及於事
伏乞詳察速賜指揮

貼黃臣聞之道路閩中災傷尤甚盜賊頗衆或云邵

武軍有強賊人數不少恐是廖恩餘黨轉運司見
令衢州官吏就近體訪雖未知虛實然萬一有之
不可不預慮也

貼黃臣謹按唐史憲宗謂宰臣曰卿等累言吳越去
年水旱昨有御史自江淮按察回言不至為災此
事信否李絳對曰臣見淮南浙江東西道狀皆云
水旱且方隅受任皆朝廷信重之臣苟非事實豈
敢上陳此固非虛說也御史官卑選擇非其人奏

報之間或容希媚況推誠之道君人大本苟一方不稔當即日救濟其饑貧況可疑之耶帝曰今後諸道被水旱饑荒之處速宜蠲貸之又按本朝會要太宗嘗語宰臣曰國家儲蓄最是急務蓋以備凶年救人命昨者江南數州徼有災旱朕聞之急遣使往彼分路賑貸果聞不至流亡兼無餓殍亦無盜賊之患苟無積粟何以拯救饑民臣近者每觀邸報諸路監司多是於三四月間先奏雨水調

勻苗稼豐茂及至災傷須待餓莩載塗然後奏知此有司之常態古今之通患也豐熟不須先知人爭奏災傷正合預備相顧不言若非朝廷廣加採察則遠方之民何所告訴

軾又狀奏曰右臣近者伏見二聖遇災而懼憂勞四方所以拯救饑民者可謂至矣兩浙淮南蒙賜度牒六百萬道而杭揚二州各得百道使民鼓舞歌詠聖澤曾未數日而淮西提刑申戶部本路常平斛斗足用不須上件

度牒兩浙轉運提刑亦申本路今年豐熟別無流民是致戶部申都省却乞拘收度牒錢斛以備別時支用都省更不奏稟聖旨便行下本路提刑司依戶部所施行臣勘會自來聖恩以災傷特賜錢物賑濟即無似此中變却自都省行下追收體例深駭物聽淮浙兩路去歲災傷之甚行路備知便使今年秋穀大稔猶恐未補瘡痍而況春夏之交稻秧未了未委逐路提轉如何見得今年秋熟便申豐稔顯是小臣無意卹民專務獻諂

而戶部都省樂聞其言即時施行追寢二聖已行之澤
百姓聞之皆謂朝廷不惜饑民而惜此數百紙度牒中
路翻悔為惠不終臣忝備禁從受恩至深不忍小臣惑
誤執政屯膏反汗虧污聖惠惜毫毛之費致丘山之損
是以冒昧獻言伏望聖慈察臣孤忠留中省覽更不降
出只作聖意訪聞戒飭執政令速降指揮更不得拘收
一依前降聖旨盡用賑濟所貴艱食之民始終被惠亦
免二聖已行恩命反覆追收失信天下臣不勝區區謹

錄奏聞

七年二月軾為龍圖閣學士知揚州又奏曰臣已具積
欠六事及舊所論四事上奏臣聞之孟子曰以不忍人
之心行不忍人之政若陛下初無此心則臣亦何敢必
望此政屢言而屢不聽亦可以止矣然臣猶孜孜強聒
不已者蓋由陛下實有此心而為臣子所格沮也竊觀
即位之始發政施仁天下聳然望太平於朞月今者八
年而民益貧此何道也願陛下深思其故若非積欠所

歷自古至今豈有行仁政八年而不蘇者哉臣前所論四事不為不切而經百餘日畧不施行臣既論奏不已執政乃始奏云初不見臣此疏遂奉聖旨令臣別錄聞奏意謂此奏朝上而夕行今又二年於此矣以此知積欠之事大臣未欲施行也若非陛下留意痛與指揮只作常程文事降出仍却作熟事進呈依例送戶部看詳則萬無施行之理臣微言輕不足計較所惜陛下赤子日困日急無復生理也臣又竊料大臣必云今者西

邊用兵急於財利未可行此臣謂積欠之在戶部者其數不貲實似可惜若實計州縣催到數目經涉歲月積欠之在戶部者累毫何足以助經費之萬一臣願聖主特出英斷早賜施行臣訪聞浙西饑疫大作蘇湖秀三州人死過半雖積水稍退露出泥田然皆無土可作田塍有田無人有人無糧有糧無種有種無牛殍死之餘人如鬼腊臣竊度此三州之民朝廷加意惠養仍須官吏得人十年之後庶可完復書曰制治於未亂保邦於未

危浙西災患若於一二年前上下疚心同力拯濟其勞費殘弊必不至若今之甚也臣知杭州日預先奏乞下發運司多糴米斛以備來年拯濟饑民聖明垂察支賜緡錢百萬收糴而發運使王覲堅稱米貴不糴是年米雖稍貴而比之次年春夏猶為甚賤縱使貴糴尚勝於無而覲執所見終不肯收糴顆粒是致次年拯濟失備上下共知而不詰問小人淺見只為朝廷惜錢不為君父惜民類皆如此淮南東西諸郡累歲災傷近者十年

遠者十五年矣今來夏田一熟民於百死之中微有
生意而監司爭言催欠使民反思凶年怨嗟之氣必復
致水旱欲望聖慈救之於可救之前莫待如浙西救之
於不可救之後也臣敢昧死請內降手詔云訪聞淮浙
積欠最多累歲災傷流殍相屬今來淮南始獲一麥浙
西未保凶豐應淮南東西浙西諸般欠負不問新舊有
舊官本並特與權住催理一年使久困之民稍知一飽
之樂仍更別賜指揮行下臣所言六事四事令諸路安

撫鈐轄司推類講求與天下疲民一洗瘡痍則猶可望
太平於數年之後也臣伏覩詔書以五月十六日冊立
皇后本枝百世天下大慶孟子有言詩曰古公亶父來
朝走馬率西水滸至於岐下爰及姜女聿來胥宇當是
時也內無怨女外無曠夫此周之所以王也今陛下膺
此大慶猶不念積欠之民流離道路室家不保鬻田質
予以輸官者乎若親發德音力行此事所全活者不知
幾千萬人天鑒不遠必為子孫無疆之福臣不勝拳拳

孤忠昧死一言

元祐五年文彥博上奏曰臣於四月二十九日至西京見本京進奏官申狀錄報皇帝太皇太后詔書以歷時災旱宿麥既盡秋稼未立上軫聖念引咎歸已特減常膳有以見聖心焦勞得堯湯罪已應天之義然臣向在都下每見西來使命詢其雨澤稼穡次第多云近已得雨苗稼滋茂臣既出京到洛見緣洛民田宿麥秋稼悉如聖詔所及深慮向去小民艱食即聚為寇盜伏望嚴

勅監司覺察守令勤恤民隱勿致煩擾及督責巡檢縣尉屏除賊盜令境內清肅人戶安居救荒之政各在疚心諸事預防庶無後患

殿中侍御史上官均乞復義倉疏曰臣聞賊盜之多常起於凶歲凶歲不足常生於無備備災卹患常平義倉之設最為良法熙寧十年始講隋唐之舊興置義倉令人戶於正稅斛斗一石別納五升準備灾傷賑濟不得移用法頗周密蓋所斂至少所聚至多蓄之郡縣而散

之於民斂之少則民易以輸聚之多則上足以施予蓄
之郡縣則凶歲有備散之於民則人情無怨此隋文皇
唐太宗嘗行於治平之世已試之效也元豐八年指揮
諸路義倉一切廢罷議者至今惜之若以為擾民則所
出纔二十分之一若患它用則當時已有著令又況水
旱不常饑饉間有發倉廩則每苦不足行勸誘則不免
強取與其施之於倉卒不若備之無事今平糴之法既
已修復唯義倉之制尚未興舉臣以為義倉貯積在近

民居則饑歲賑濟無道路奔馳之勞費而人受實惠隋
開皇中就社置倉蓋以此也臣欲乞興復義倉之法令
於村鎮有巡檢廨舍處建立倉廩以便斂散其餘例令
有司更加修整以備饑歲誠非小補

哲宗時戶部侍郎蘇轍因旱乞許羣臣面對言事劄子
曰臣伏見二年以來民氣未和天意未順災沴洊至非
水即旱淮南饑饉人至相食河北流移道路不絕京東困
弊盜賊羣起二聖遇災憂懼傾發倉廩以救其乏絕獨

此三路所散已近三百萬斛矣異時振恤未見此比然而民力已困國用已竭而旱勢未止夏麥失望秋稼未立數月之後公私無繼羣盜蜂起勢有必至臣未知朝廷何以待此臣竊見太皇太后陛下清身奉法與物無私皇帝陛下恭默靖慎動由禮義皇天后土照知此心和氣不應深所未喻陛下嘗究其說否臣聞天氣下降地氣上騰陰陽和暢雨澤乃至君廣聽以納下臣盡言以上上交泰元氣乃和今二聖居幃箔之中所與

朝夕謀議者上止執政大臣下止諫官御史不過數十人耳其餘侍從近臣雖六官之長皆不得進見而況其遠者乎臣以謂羣臣識慮深淺不同其心好惡亦異故須兼聽廣覽然後能盡物情而得事實今陛下聽既不廣則所行之事不得不偏聽狹事偏則陰陽亢隔和氣不効必然之理也臣觀祖宗故事百官有司皆得以職事進對從容訪問以盡其情今二聖臨御四方履人主之位而謙恭退託踈遠羣臣不行人主之事遂使百官

不敢以職事求見臣謂宜因此時明降詔書許百官面
奏公事上以盡羣情之異同下以閱人才之賢否人心
不壅天道必從則久旱之災庶幾可息臣蒙國厚恩比
聞詔書引咎自責避正殿損饔分命臣僚並走羣望私
心踧踖不敢違寧輒推天意人事影響之應庶幾有補
萬一惟陛下恕其愚僭畧賜采擇

右司諫王覲奏乞稍貴京師常平倉米疏曰臣伏見在
京諸倉糶常平米每斗六十文至六十五文省有以見

朝廷不惜虧損官本而惟以利民為務也然臣竊慮賤糶如此於小民足為一時之利於國計乃非長久之策何以言之夫京師者衆大之居也生齒之繁何可勝計民所食者軍糧之外則皆商賈所運自外而至也今官糶甚賤非所以致商賈也彼商賈所販雖新米其價乃與陳米相視而低昂者也京師之民舊多食麥而今多食米以米賤故也使旁郡之米麥入京師者浸少豈長久之策哉常平米固有限不常糶也雖有時而不糶商

賈亦必以為疑而不肯多致恐一旦常平害之也夫物價不獨甚貴之為害而甚賤之亦所以為害故所謂常平者不欲其甚貴甚賤而已今賤常平之米為小民一時之利以疑商賈使民間無高廩陳粟以為長久之備孰為得計哉臣愚以謂不若稍貴常平之米使無定著以為令而示信於商賈也假如著令曰京師常平米一斗其價以百錢為定毋輒增損糴者若干斗以下勿拒也行之既久商賈信之則稔歲必厚畜以

待價使旁郡之米麥入於京師者浸多而京師可實也
貼黃京師米價稍貴則不惟可以致四方之米麥又
可使京師諸軍所請月糧不出於京城并畿甸諸
軍所請月糧不出於畿甸而入於京師也自去歲
京東淮南不稔小商爭糴軍糧順流而下以邀厚
利豈所以實京師哉夫賤糴有限之米而外拒商
賈內虛京師矣一旦罷糴則米必踴貴而益為小
民之害其故何也商賈失利而民間無積粟也故

去冬已嘗罷糶而價遂騰踴朝廷不得已乃復糶
米是其驗也豈有京師生齒之繁如此而必待賤
糶官米以為常而後可以致其足則為術亦踈矣
故臣以謂不若稍貴常平之米使無甚貴其賤之
弊乃京師長久之利也

貼黃勸農莫如貴粟今雖未能貴天下之粟而京師
賤糶何可常也臣竊聞京師軍儲僅支三年不可
謂有蓄積矣不幸有數千里之水旱三二年之災

傷而上供不繼何以為謀方且賤糶常平凶歲之備以虛京師非計也京師自去歲以來民不覺饑饉惟近日河北流民入唐鄧者路由京師已於城門賑濟矣今糶常平米者即非饑饉之民也

覲又上疏曰臣伏聞河北水災郡縣民多失業合用義倉及常平斛斗賑濟深恐數少難以遍及闕食人戶竊知措置糶便司甚有積粟見已差官變轉乞於上件斛斗內先將陳次堪充喫用斛斗廣行賑濟其賑濟事仍

乞指搆提舉司糴便官與轉運提刑司同共管勾所貴
那移斛斗之類遞相照應易為辦集兼聞甚有河防城
壁合行修築若差急夫稍多即雖非水灾人戶亦須困
弊臣欲乞朝廷委逐司相度如內有可以召募水灾人
戶工役之處即亦將上件措置糴便司斛斗優與糧食
召募應役其器用等依條官給庶不至多差急夫仍令
水灾之民得食其力伏望聖慈詳酌特賜指揮施行

覲又奏為河北流民乞指揮賑濟疏曰臣近見道路頗

有流民每令人問當皆是河北百姓往京西逐熟亦有
乞丐於路者今春耕是時而民之轉徙者不得耕種則
秋成無望況新陳不接之際災傷之民尤宜存恤臣欲
乞朝廷指揮下京城門抄劄流民如委是人數稍多即
乞差官就城門量給口食并指揮河北監司多方賑濟
及借與種糧免令更有流移致河北人戶減耗

貼黃流民不自京城中過者亦必不少緣河北百姓
既頻經水災又每年夫役重大故歲稍不稔則輕

去田間無安土樂業之意以此若遇災傷尤宜厚
加賑恤去歲朝廷雖累有指揮賑濟臣竊慮郡縣
官吏或未能推廣聖恩致流轉者不止伏望聖慈
申飭本路監司督察郡縣存恤災傷之民無令失
所

曾鞏上救災議曰臣聞河北地震水災隳城郭壞廬舍
百姓暴露乏食主上憂憫下緩刑之令遣拊循之使恩
甚厚也然百姓患於暴露非錢不可以立屋廬患於乏

食非粟不可以飽二者不易之理也非得此二者雖主
上憂勞於上使者旁午於下無以救其患塞其求也有
司建言請發倉廩與之粟壯者人日二升幼者人日一
升主上不旋日而許之賜之可謂大矣然有司之言特
常行之法非審計終始見於衆人之所未見也今河北
地震水災所毀敗者甚衆可謂非常之變也遭非常之
變者亦必有非常之恩然後可以振之今百姓暴露乏
食已廢其業矣使之相率日待二升之廩於上則其勢

必不暇乎它為是農不復得修其畝商不復得治其
貨賄工不復得利其器用閒民不復得轉移執事一切
棄百事而專意於待升合之食以偷為性命之計是直
以餓殍之養養之而已非深思遠慮為百姓長計也以
中戶計之戶為十人壯者六人月當受粟三石六斗幼
者四人月當受粟一石二斗率一戶月當受粟五石難
可以久行也則百姓何以贍其後久行之則被水之地
既無秋成之望非至來歲麥熟賑之未可以罷自今至

於來歲麥熟凡十月一戶當受粟五十石今被災者十餘州州以二萬戶計之中戶以上及非災官所被不仰食縣官者去其半則仰食縣官者為十萬戶食之不通則為施不均而民猶有無告者也食之徧則當用粟五百萬石而後可以辦此又非深思遠慮為公家長計也至於給授之際有淹速有均否真偽有會集之擾有辯察之煩措置一差皆足致弊又羣而處之氣久蒸薄必生疾厲此皆必至之害也且此不過能使之得旦暮之

食耳其餘屋廬構築之費將安取哉屋廬構築之費既無所而就食於州縣必相率而去其故居雖有頽墻壞屋之尚可完者故材舊瓦之尚可因者什器衆物之尚可賴者必棄之而不暇顧甚則殺牛馬而去者有之伐桑棗而去者有之其害又可謂甚也今秋氣已半霜露方始而民露處不知所蔽蓋流亡者亦已衆矣如不可止則將空近塞之地空近塞之地失戰鬥之民此衆士大夫之所慮而不可謂無患者也空近塞之地失耕桑

之民此衆士大夫所未慮而患之尤甚者也何則失戰
鬪之民異時有警邊戍不可以不增爾失耕桑之民異
時無事邊糴不可以不貴矣二者皆可不深念歟萬一
或出於無俚之計有窺倉庫盜一囊之粟一束之帛者
彼知己負有司之禁則必鳥駭鼠竄竊弄鋤挺於草茅
之中以扞游徼之吏強者既囂而動則弱者必隨而聚
矣不幸或連一二城之地有枹鼓之警國家胡能晏然
而已乎況夫外有邊陲之可慮內有郊祀之將行安得

不防之於未然銷之於未萌也然則為今之策下方紙
之詔賜之以錢五十萬貫貸之以粟一百萬石而事足
矣何則今被災之州為十萬戶如一戶得粟十石得錢
五千下戶常產之資平日未有及此者也彼得錢以完
其居得粟以給其食則農得備其畝畝商得治其貨賄
工得利其器用間民得轉移執事一切得復其業而不
失其常生之計與專意以待二升之廩於上而勢不暇
乎它為豈不遠哉此可謂深思遠慮為百姓長計者也

由有司之說則用十月之費為粟五百萬石由今之說則用兩月之費為粟一百萬石況貸之於今而收之於後足以賑其艱乏而終無損於儲侍之實所實費者錢五鉅萬貫而已此可謂深思遠慮為公家長計者也又無給授之弊疾癘之憂民不必去其故居苟有頽牆壞屋之尚可完者故材舊瓦之尚可因者什器衆物之尚可賴者皆得而不失況於金牛馬保桑棗其利又可謂甚也雖寒氣方始而無暴露之患民安居足食則有樂

生自重之心各復其業則勢不暇乎它為雖驅之不去
誘之不為盜矣夫饑歲聚餓殍之民而與之升合之食
無益於救災補敗之數此常行之弊法也今破去常行
之弊法以錢與粟一舉而賑之足以救其患復其業河
北之民間詔令之出必皆喜上之足賴而自安於畝畝
之中負錢與粟而歸與其父母妻子脫於流轉死亡之
禍則戴上之施而懷報之心豈有已哉天下之民間國
家措置如此恩澤之厚其孰不震動感激悅主上之義

於無窮乎如是而人和不可致天意不可悅者未之有也人和洽於下天意悅於上然後玉路徐動就陽而郊荒夷殊陬奉幣來享疆內安輯里無囂聲豈不適變於可為之時消患於無形之內乎此所謂審計終始見於衆人之所未見也不早出此或至於一有枹鼓之警則雖欲為之將不及矣或謂方今錢粟恐不足以辦此夫王者之富藏之於民有餘則取不足則與此理之不易者也故曰百姓足君孰與不足百姓不足君孰與足蓋

百姓富實而國獨貧與百姓餓殍而上獨能保其富者自古及今未之有也故又曰不患貧而患不安此古今之至戒也是故古者二十七年耕有九年之畜足以備水旱之災然後謂之王政之成唐水湯旱而民無捐瘠者以是故也今國家倉庫之積固不獨為公家之費而已凡以為民也雖倉無餘粟庫無餘財至於救災補敗尚不可以已況今倉庫之積尚可以用獨安可以過憂將來之不足而立視夫民之死乎古人有言曰剪爪宜及

膚割髮宜及體先王之於救災髮膚尚無足愛况外物乎且
今河北州軍凡三十七災害所被十餘州軍而已它州之田
秋稼足望令有司於糴粟常價斗增一二十錢非獨足以利
農其於增糴一百萬石易矣斗增一二十錢吾權一時之事
有以為之耳以實錢給其常價以茶薺香藥之類佐其虛估
不過捐茶薺香藥之類為錢數鉅萬貫而其費已足茶薺香
藥之類與百姓之命孰為可惜不待議而可知者也夫費錢
五鉅萬貫又捐茶薺香藥之類為錢數鉅萬貫而足以救一

時之患為天下之計利害輕重又非難明者也顧吾之有司越拘攣之見破常行之法與否而已此時事之急也

侍御史陳次升奏陝西旱乞行賑濟疏曰臣竊聞陝西路今夏亢旱秋收最薄物價騰踴民食頗闕緣本路州軍并監司先以秋間雨澤得時遂奏年稔今日人戶闕食不敢以聞誠為未便且國以民為本民以食為天陝右之民今既闕食豈能安土弱者必散而之它路强者必嘯聚而為盜矧今邊庭未寧宿兵在境沿邊人民若

有流亡外寇之敵實深可憂臣欲乞睿旨下本路勘會
如人戶委是闕食即行賑濟安存無令流移若本路斛
斛不足即多方擘劃轉移它路物斛應副支用不勝幸
甚

時吳中大饑方議賑恤以民習欺誕敕本部料檢家至
戶到左諫議大夫鄭雍言此令一布吏專料民而不救
災民皆死於饑今富有四海奈何謹圭撮之濫而輕比
屋之死乎哲宗悟追止之

時大旱著作佐郎司馬康上疏言比年以來旱暵為虐
民多艱食若復一不稔則公私困竭盜賊可虞自古聖
賢之君非無水旱惟有以待之則不為至害願及今秋
熟令州縣廣糴民食所餘悉歸於官今冬來春令流民
就食候鄉里豐穰乃還本土凡為國者一絲一毫皆當
愛惜惟於濟民則不宜吝誠能捐數十萬金帛以為
天下大本則天下幸甚詔從之

歷代名臣奏議卷二百四十五